

Avatangiisinut Aningaasaateqarfik pillugu Inatsisartut inatsisaat

Kapitali 1

Avatangiisinut aningaasaateqarfiup siunertaa suliaasaalu

§ 1. Avatangiisinut Aningaasaateqarfimmik, missingersuusiornikkut naatsorsuutigullu teknikikkut aningaasaateqarfiusussamik, aningaasanullu inatsimmi immikkoortumik kontoqartussamik, pilersitsisoqassaaq.

Imm. 2. Avatangiisinut Aningaasaateqarfiup siunertaraa, inuiaqatigiit iluanni piujuartitsisumik ineriartorneq nukittorsarneqassasoq, inuup inuunerani atugassarititaasut ataqqillugit, uumasut naasoqarnerlu atajuarsinnaaqullugit, suliaasaqarfiit § 2-mi eqqartorneqartut eqqarsaatigalugit.

Imm. 3. Avatangiisinut aningaasaateqarfimmi aningaasaatissat makkuninnga pissarsiarineqassapput:

- 1) Avatangiisinut akitsuutinit il.il., nioqqutissat sulianilluunniit avatangiisinut immikkut nanertuutaasinnaasutut nalilerneqarsimasut akitsuusersorneqarnerinit isertitat.
- 2) Avatangiisinut akitsuutit aalajangersimasumik pissusilersortalernissamut siuarsaanissamik siunertaqartut.
- 3) Nunap Karsianit aningaasaliissutit.

§ 2. Avatangiisinut aningaasaateqarfiup isertitai avatangiisinut pitsanngorsaatissatut suliniutinut aningaasaateqarfiullu siunertaata iluani ingerlatanut atorneqassapput. Tapiisoqarsinnaavoq imatut ilusilimmik:

1) Suliaasaqarfiup imalt. ingerlatassap avatangiisit pillugit akitsuuserneqarsimasup iluani nalinginnaasumik avatangiisinut pitsanngorsaanissaq siunertaralugu suliniutinut.

2) Avatangiisini nanertuinnginnerunissaq qulakkeerniarlugu atuisut akornanni akitsuuserneqarsimasut aalajangersimasumik pissusilersortarnissaat anguniarlugu.

Imm. 2. Avatangiisinut aningaasaateqarfiup aningaasaatai ingerlatassanut, suliaasanut makkununga tunngassuteqartunut atorneqarsinnaapput:

- 1) Ikuallaaviit eqqagassanillu isumaginnittarnerit pilersinneqarnissaannut imaluunniit nutarternissaannut.
- 2) Anartarfilerisarfinnik pilersitsineq imaluunniit nutarterineq.
- 3) Eqqakkanik inissiisarfinnik nakkutigisaasunik pilersitsineq.
- 4) Qamutiniq motoorilinnik atorsinnaajunnaartunik passussineq, ilanngullugu isaterineq imaluunniit atoqqineq.
- 5) Suliffeqarfiit, sullissiviit, inissiat imalt. asimi eqqakkanik passussineq.
- 6) Angallatinik qimatanik passussineq.
- 7) Aalisakkanut qassutiniq igitanik allanillu imaani eqqakkanik passussineq.
- 8) Aalisartarfinnik piniariartarfinnillu eqqiluutsuutitsineq.

9) Suliassat, innuttaasut aamma suliffeqarfiit isumalluutiniq eqqumaffiginninnissaannut ajornarunnarsitsisussat imaluunniit ajornannginnerulersitsisussat.

Imm. 3. Inuussutissarsiorlutik suliffeqarfimmut avatangiisitigut imalt. inuussutissarsiornikkut ingerlatanut unammilleqatigiinnermik equtitsisuusinnaasunut tapiissuteqartoqarsinnaanngilaq.

§ 3. Avatangiisinut aningaasaateqarfiup suliaqarnera, ingerlatanut aatsitassat pillugit ingerlatalu tamatumunnga pingaarutillit pillugit inatsisartut inatsisaanni pineqartunut ilaasunut, atuutinnngilaq.

§ 4. Avatangiisinut akitsuutitut inatsisinit isertitat, takuuk § 1, imm. 3, nr. 1 aamma 2, akitsuummumut inatsimmi allassimappat, taanna avatangiisinut akitsuutitut inatsisaasussatut siunertaqartoq, aammalu isertitat Nunap karsianut tutsinneqassasut akitsuummumut inatsimmi pineqartumi tassani aalajangersimasumik aalajangersarneqarsimanngippat, siunertanut § 2-imi allassimasunut matussutissatut Avatangiisinut aningaasaateqarfimmut tutsinneqassapput.

Kapitali 2

Avatangiisinut aningaasaateqarfiup aqunneqarnera aamma allaffissornikkut aqutsineq

§ 5. Avatangiisinut aningaasaateqarfiup allaffissornikkut aqunneqarnera, Naalakkersuisut Siulittaasuanit isumagineqarpoq.

Imm. 2. Naalakkersuisut Avatangiisinut aningaasaateqarfiup suliaqarnera pillugu nalunaarummik tamanut ukiut tamaasa saqqummiisassapput. Aningaasaateqarfiup naatsorsuutai Nunap Karsiata naatsorsuutaasa kukkunersiorneqarnerannut ilaatillugu kukkunersiorneqartassapput.

Imm. 3. Naalakkersuisut Avatangiisinut aningaasaateqarfimmi tapersiissutiniq tunniussisarneq aammalu aningaasaateqarfiup allaffissornikkut aqunneqarnera pillugit maleruagassanik erseqqinnerusunik aalajangersaasinnaapput.

Kapitali 3

Aalajangersakkat inaarutaasut

§ 6. Inatsisartut inatsisaat manna ulloq 1. januar 2019 atuutilerpoq.

Namminersorlutik Oqartussat, ulloq 27. november 2018

Kim Kielsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut